

SEBASTIANO BENENATI

LU 'NCONTRU

Vint'anni giusti giusti avia iu fattu,
Quannu mi abbinni un granni 'ncontru stranu.
'Nzina a tannu iu nun era suddisfattu
Di soccu succiria a li me' manu.
Soccu facia facia, era distrattu
Senza spiritu era, sanu sanu.
'Na sira si presenta avanti a mia
Un cristianu, e fermu mi talia.

Mi talia cu du' occhi alluminati,
Mi rici: "Dunni va' senza 'na metà?
Vo' viriri la vera umanitati?
Vo' aviri la cuscenza frisca e leta?
Lassali stari ddà li vecchi strati,
E fissa l'occhi a la vera cumeta".
E comu si 'ntanau Nuè nell'Arca
Acchianavi cuntentu 'nta dda varca.

Grapivi li me' occhi tutt'a un trattu,
Allargavi lu cori cu dilettu.
Mi rissi: "Chistu, sì, ch'è un granni fattu!"
E vitti lu Maestru, omu perfettu,
Chiddu chi sana lu mali e lu sfattu,
Chiddu ch'è allatu ad un funnu di lettu.
Ma soprattuttu chiddu chi t'acchiappa
E voli beni, anchi si tu sì schiappa.

Mi 'ntisi comu un mortu arrivisciutu
O comu 'n arvuliddu abbiyiratù.
Accuminciavi a dari lu me' aiutu
A cu' era bisugnusu e anchi malatu.
Lu munnu senza Diu certu è pirdutu,
Ed è comu un carrettu sdirrubbatu.
Senza li Sacramenti 'un c'è sarvizza,
Ma c'è rancuri, odiu, 'gnuranza e stizza.

Amici chi campati ni sta storia,
'Nta lu cori 'un c'è postu pi du' dii.
Turnati 'nchiesa, faciti mimoria,
Datici ascutu a li veri disìi.
Cu Cristu fici Diu la sanatoria.
Aggrappamuni tutti a santi pii.
Dintra sta Chiesa c'è vita, c'è via,
Supra l'esempiu di Santa Maria.

A ORONZU DE GIOVANNI

Quannu ti viu, spissu m'addumannu
Qual è lu veru sensu di lu munnu.
A chi servi di sòffriri un malannu,
Si lu distinu nun tinemu 'mpugnu.

Cu' rici ch'è disgrazia o ch'è sfortuna,
Cu' rici ch'è lu casu di la vita.
Cu' è chi la risposta 'un ni la runa,
Cu' rici ch'è 'na pena stabilita.

Su' tanti li pinsati di la genti:
"Megghiu la morti, a un sòffriri e campari",
Dici cu' nun accetta patimenti,
Picchì ama la vita salutari.

Fa 'mpacci lu malatu casa casa.
Si dici chi la vita è n'atra cosa.
Rifiutannu la cruci, l'omu sfasa.
E lu jornu e la notti 'un arriposa.

'Mmeci tu, caru Oronzu, amicu miu,
A tutti sti gran dubbi du' risposta.
E je' 'nta lu to' visu viu a Diu,
Chi mannau a Cristu 'nta sta terra apposta.

Tu cu la to' gran firi e la spirienza
Ni cancelli ogní dubbiu e ogní incertizza,
Ni rici chi la vita è suffirenza
Chi, si s'abbrazza, porta la sarvizza.

Tu spera, Oronzu, comu speru iu!
La strata di la Crucì porta a Diu!

ALLATU A LU SIGNURI

Ni 'na seggia assittatu, dura dura,
Je' ti 'ncuntravi, Oronzu, a prima sira,
Pinsavi 'ntra di mia: "Oh chi svintura!"
Lu me' istintu scattau, già chinu d'ira.
L'occhiu to', 'nveci, chinu di friscura,
Lu pettu adaciu adaciu chi suspira,
Mi canciaru ogni bruttu sintimentu,
Si cuità lu me' cori 'nta un mumentu.

Li vrazza si muvianu a granni stentu,
Ma l'occhi luminusi comu a un Santu!
La facci, senza traccia di lamentu:
"Sia paci a tua!" dicisti, senza scantu.
Si carmau 'ntra di mia ogni turmentu,
Ogni to' frasi mi paria un cantu.
Di fermu e senza peri caminavi,
E allatu a lu Signuri mi pertavi.

Comu unu crucifissu, fermu stavi.
Nta li vrazzudda mei tu ti strincivi.
E quannu 'ncarrozella caminavi,
Quantu voti: "Mischinu!", arricivivi.
Ma è mischinu cu' la firi 'un avi.
Cu' è ch'è vivu e sanu, ma nun vivi.
A cu' ci pari chi chiovi e 'un si vagna,
Firria firria, ma sta nta la magagna.

Senza Cristu, la vita è sulu lagna,
È comu un picciriddu chi nun sogna
Cu' avi firi sposta 'na muntagna,
Cu' nun n'avi, s'abbrazza a la minzogna.
Cu' è chi nun si movi, feti e stagna,
Addiventu com'acqua nta na fogna.
Oronzu, dici tu: "La vita è bella!"
'Mparaddisu sta' jennu 'ncarrozella.

CHIAMATI DI DIU

Già sona la campana, ogni matina,
Lu suli araciù araciù s'arruspiggia.
'Ncampagna già si squagghia l'acquazzina,
'Mpaisi c'è cu' dormi e c'è cu' vigghia.
La munachedda è ddà 'ntra la batia,
Chi prega cu gran firi e 'un si siddia.

E prega a lu Signuri e s'arricrià.
Povira, casta e santa, sempri spera.
All'occhi di lu munnu è na pazzia,
Ma pi idda ssa strata è chidda vera.
E 'ntra li quattro mura 'mpaci sta.
Cu' sta cu Diu, campa 'nlibirtà.

Francesca, Mara, Stella e Catarina,
Chi dicistivu sì a lu Signuri,
Facistivu 'na scerta saggia e fina,
La paci la sazziati a tutti l'uri.
La vostra vita è veru sacramentu,
Chi lu munnu manteni ogni mumentu.

FILASTROCCA DI BABBU NATALI

No, nun vi spavintati, picciriddi,
Chi vi portu rigali, li cchiù beddi.
Vi rugnu carameli e anchì nuciddi
E, a cu' avi renti boni, cuddureddi.
Vegnu di ddà, di 'mmenzu di li stiddi,
Dunni ci sunnu l'ancili e l'aceddi.
Sapiti picchì fici stu caminu?
V'annunziu ch'avi a nasciri un Bamminu.

Lu Bammineddu vinni tra li genti,
Si fici nicu nicu, comu a tanti.
Iddu è lu figghiu di l'Onnipotenti,
Iddu è lu re di tutti li rignanti.
Nasciu doppu di tanti guai e stenti
Pi Maria e pi Giuseppi, assai pinzanti.
Ancora cchiù stupìti, li pasturi
Dissiru: "Chistu è certu lu Signuri!"

Fu accussì chi sunaru li campani.
Parteru di li munti e li marini.
Cu' è chi ci purtà tumazzu e pani,
Cu' è chi ci purtà cannistri chini.
E noi chi ci purtamu, paisani?
Gesù nun voli oru, nè zecchini.
Ni 'mmita a fari beni a tutti quanti,
'Mmenzu l'affetti e li pinzeri santi.

LA VERA PACI

Lu millenovicentottantasetti,
Lu misi di Dicembri, jornu ottu,
Ci foru tant'abbrazzi e tant'affetti
Tra Gorbaciov e Regan di bottu.
Strincennusi li manu e anche li petti,
Ficiru paci nta quattro e quattr'ottu.
“Viva la paci”, girau ogni terra.
Ma paci 'un è mancanza di la guerra.

Paci 'un è sulu mancanza di guerra,
E già la storia stessa ni nni parra.
L'omu fa paci, ma doppu s'afferra;
Fa l'armistiziù, ma doppu arrè sgarra.
Pi lu putiri l'attaccu iddu sferra,
Sona lu mitra comu 'na chitarra.
Si chissu succirissi, penzu iu,
Chissa 'un è paci chi veni di Diu.

Giustizia è chidda chi veni di Diu,
Chi cu lu granni amuri ni crialu.
Ni fici pi campari cu armu piu,
Ma prestu l'omu già s'alluntanau.
Iddu s'alluntanau e s'inorgogliu
Ed a li beni troppu s'attaccau.
E la storia d'Adamu chi piccà,
Gira, vota, e firria, ma è ancora ccà!

Morti di fami ancora ci n'è assà,
Morti di droga ci n'è assà di cchiù.
C'è cu' a nasciri 'un avi libirtà,
E cu' a murìri p'un sòffriri cchiù.
Chistu è lu munnu chi curri e chi va:
E t'arramazzi ammatula ora tu.
La vera paci è di Cristu viventi,
Si nta lu cori l'avemu prisenzi.

A ME' PATRI

O patri, chi muristi all'improvvisu,
'Nta li me vrazza comu 'n acidduzzu,
E senza turbamentu nta lu visu,
Rasti la vita comu 'n agnidduzzu,
Novi jorna tu 'ncruci stasti misu
E lu capisti prestu lu discursu.
“Npacì” (dicisti), “è veru, figghiu miu,
Iu ti lassu. Mi chiama nostru Diu”.

Li voti chi ti pensu, patri miu,
Iu trasu 'n forti crisi e m'addumannu:
“Dunn'è l'affettu? Ma chi fa, svaniu?
Dunn'è lu to' travagghiu cu l'affannu?
Puru la to' bontà cu tia murìu?
Comu li jorna forsi si ni vannu?
Po' dòminu l'istintu cu la firi,
Chi vola 'ntra li Santi e ddà ti viri.

O patri, chi partisti all'impruvvisu,
E sulu mi lassasti tu, ccà gghiusu,
Si tu partisti pi lu paraddisu
Jè arristavi 'nta stu munnu chiusu.
Ancora comu lu lassasti è misu,
Chiddu dunni sì tu, è cchiù gluriusu.
Lu Patri Eternu ddocu prea pi mia
Picchè iu vinissi un jorne, ddocu, a tia”.

A ANTUNINU CANZUNERI

Vurria sapiri, o me' caru Antuninu,
Dunn'e chi sunnu li to' santi manu.
Quannu a lu pianu li tinii vicinu,
Li tasti accarizzavi, a manu a manu.
Di Schubert faci l'avimaria
E s'inchia la to' casa d'armunia.

Vurria vîriri chiddi to' piruzzi,
Chi a stentu ma sicuru tu jttavi.
Pi muntati, chianuri e anchi viuzzu,
Tu 'mpincivi, ma po' ti ripigghiavi.
Ma di sabbatu, com'un trabbucchettu,
Ti li sintisti fermi 'nta lu lettu!

Vurria sapiri si la to' vuccuzza,
Cu ddi rintuzzi beddi chi ci avii,
Lu microfunu fu di la to' armuzza,
Chi a santi frasi tu biniricci:
"Cu tia piggiami, o cori di Gesu",
Fu l'urtima to' frasi e nenti cchiu.

Vurria sapiri, o me' caru Antuninu,
Siddu l'ucchiuzzi toi nun foru 'nvanu.
Forsi virii luntanu, di vicinu:
Lu spiritu ti rava la so' manu.
C'e cu' avi la vista ma nun viri,
Tu viristi luntanu cu la firi.

Biatu cu' 'un ci viri, ma ci criri!
A santu Masi nun rassumigghiavi.
Antuninu, la firi ci l'avivil!
La Bibbia santamenti 'nterpritavi.
Cu un jritu indicavi lu virsettu,
E to' frati assuppava 'nta lu pettu.

Li to' manu su' a un munnu cchiù pifettu.
Su' 'ncapu a un pianoforti senza tasti.
E fannu dd'armunia ni lu banchettu,
E li piruzzzi to' nun fannu rasti.
La to' vuccuzza canta lodi veri.
E sì veru Antuninu Canzunerì.